

No Servus, Diener und Habe die Ehre!

Etze kummt dos

Nej su wos

vu Sömde, n 22. April 2023



Ingrid Zasche

Orbeith, die Maschinn iebernumm hon

Dr Mensch ös mehrschtns a faules Luder. De Gablinzer sohn dou „Faule (odr ou blede) dorf mr jo sein - mr muss sich ock zu halfn wössn!“ Mr kennte sprechn, doss Faulhejt sugor a bössl intelligent macht. Nujo, a Fauler sellte halt zun Ausgleich gescheut genug sein, Zeug zu derfindn, wos n de Orbeit obnömmt, die ha ne machn mog, odr se wingstns lechter macht.

Noche wie ich jung wor, wor Hausorbeit röchtsche Schwerorbeit: Tebiche nausschleppn und kloppn, de Klunkrn woschn, schweijn und ufhängn, dreimoul täglich Kroum woschn und su fort. Heute houts ei enn modern Hause fr suwos Maschinn. Zun Beispiele de Kroumwoschmaschinn, wu mr s drecksche Geschörre ock neisortiern braucht und drnouchrn sauber und troiche ei n Schrankn stelln kon. Jede Familie hout außerdan wingstns enn Staubsauger, ane Woschmaschine und enn Kiehlschrankn. Dos gehiert bei uns su sehr zun Labn, doss mr die dötn Dinger ne amoul pfändn dorf. De Ufn zun Kochn tun inzwöschn ou olle mieglichn Stickl spielen bis hie zun Eistelln vu aner Zeit, wu se vu salbr zun Kochn ofangn solln, dosses Assn fertsch ös, wemmr vu dr Orbeit hejmkummt. Frierer hout mr orscht amoul ofeuern und dann drbeine bleibn und ufpossn missn, doss de Hötze beständig wor. Dr ejntsche Luxus drbeine wor dr Uftoup, ei dan hotte mr ömmr wormes Wossr. Obr dos kricht mr jo heutzutage aus dr Wand...

Ou sehr nitzlich ös a Gefrierkostn. Dou konnste glei a poor Moulstn vurkochen und ufhebn, bös de se brauchst. Odr mr tut Kuchn eifrieren, doss mr wos dou hout, wenn iebraschnd Gäste kumm. Dou drfier hon de reichn Leute frieher grüße, schware Eiskletzl aus enn zugefurnen Flusse odr Teiche schloun lossn missn. Die wurn miehsum hejmgefohrn und an Brunnhäusl odr ei enn sehr tiefn Kallr ufbewohrt. Orme Leute hon fr ane Riebn- oder Arepplmiete halt ock a Louch ei de Are gemacht und gehofft, doss n ne amende de Mäuse drogiehn. Vur dan Viechern ös Zeug ei enn Eiskosten iebrichns ou söcher. Nahn dan grußn Haushaltsmaschinn houts r ou a Hoffl klinsche Maschienl: Koffemaschinn, Wossrkoher, Toaster, Stabmixer, Korschmentsteyner, Frittös, Riehr- und Knetmaschinn fr Tejg und wos ne noch olles. Ei Brutbackautomatn und Thermomixe muss mr - wie mr hiert, iech ho suwos ne - ock noch olle Zutatn neischmeißn, und nouch ar Weile kummt s fertsche Brut odr Assn raus.

Und ich ho noch gor ne vu menn Lieblingsspillzeuge derzählt, n Computer. Olles, wos vu salbr oblaufn tut, word jo vu klintschn Computern gesteuert. **Mir** tut su a Computer obr vur olln de Orbeit ban Schreibern lechter machn. Wenn iech de ganzn Artiki fr de Zeitung vu Hand schreibn misste, wär ich schiene orm dro. Schunt ane Schreibmaschine wor dou a Gewönn. Obr wenn enn de Uftejlung vu enn Texte ne gefolln hout, odr wenn ei enn offizielln Dokumente a Fahrl drönne wor, hout mr mit dar Schreibmaschine halt dos ganze Ding neu tippn missn. Midn Computer tut mr etze ock an Böldschörme de Fahrl ausbessern oder n Text a bössl ömstelln - und schun kon mr dan Text fehlerfrei wie gedruckt uf s Popier brengn. Dou drfier hoste frieher ane zömmrgrüße Druckmaschine hon missn.

Dos sein etze ock a poor Beispiele aus n privatn Labn. S ös ne zun Fossn, wie sehr sich s Orbeith ei **olln** Bereichn ei dan letzt n fuchzich Juhrn vrändrt hout, nauer. Ich wejß ock ne, ob dos worklich ömmr zun Bessern wor. Moiches tut de Walt öm uns röm halt doch hibsich belostn. Obr dos ös ane andere Geschöchte. Mejt dr ne ou?
